



NATIONALIST DEMOCRATIC PROGRESSIVE PARTY (NDPP)

Facta non Verba


- **STABLE GOVERNMENT**
- **PROGRESSIVE VISION**
- **MATURE LEADERSHIP**
- **MOVEMENT FOR UNITY**



**NAGALAND - TOWARDS A
STATE OF EXCELLENCE**



Denmark Crown Prince Frederik André Henrik-i India semdang



Feb. 26, 2023 : Denmark's Crown Prince Frederik Andre Henrik Christian adser Princess Mary Elizabeth na Taj Mahal, Agra nung noksa tangokba yangi angur.

New Delhi, Tsüklai/February 26 (Agencies): Denmark Crown Prince, Frederik André Henrik Christian aser Crown Princess Mary Elizabeth nati anogo pezünü India semdanga Amongnü New Delhi tonga aruogo.

Tesüiba küm 20 tsüngda tang mezüng Denmark nungi tamarener kibongi India semdang.

India tatong Tir, Jagdeep Dhankhar-i jaokba nung ajemdaker tang tamarener kibongi linük semdang, ta Ministry of External Affairs (MEA)-i metetdaksü.

External Affairs Ministry nung otongdar, Arindam Bagchi-i twitter ajanga, lenir anati linük semdangba ajanga linük ana tsüngda tesendaktep ano tajungba akümtsü, ta metetdaksü.

Tenatisa Agra aser Chennai semdangba sülen March 2 nü Chennai nungi meyipa aotsü.

Denmark Foreign Minister, Lars Løkke Rasmussen, Environment Minister Magnus Heunicke aser Minister for Climate, Energy & Utilities, Lars Aagaard nungeri tena meina aru.

"Linük semdangba mapang

nung Crown Prince-i tatong Tir ajurutsü aser CII-i ayongzükbä 'India-Denmark: Partners for Green and Sustainable Progress' tetenzük sentong nung jembitsü. Pai linük Tir, Droupadi Murmu-a ajurutsü," ta Ministry of External Affairs (MEA)-i metetdaksü.

"India aser Denmark na ya democracy linük aser tongtibang onük aika nung tangatetba kasa lir. Tamarener kibongi semdangba ajanga India aser Denmark na tsüngda tesendaktep ano tajungba akümtsü imlar," ta MEA sangdong ajangasa metetdaksü.

PM Modi-i Arvind Kejriwal tsübur: AAP

New Delhi, February 26 (Agencies): Delhi excise policy ochimashi ken o dak sendakba nung Central Bureau of Investigation (CBI)-i Delhi Deputy Chief Minister, Manish Sisodia dang asüngdangyatsü jelia Amongnü Aam Aadmi Party (AAP)-i, Ato kilonser, Narendra Modi-i AAP tongti lenir, Arvind Kejriwal tsübur, ta metetdaksü.

Osangbenertem den jembidang Delhi Environment Minister aser AAP lenir Gopal Rai-i, Sisodia aputsü aliba ya kanga tia maka, ta ashi.

Paisa, Sisodia-i Raj Ghat semdangba mapang pa meina moudaktsütsü nükjidong nung AAP lenirtem kar 'house arrest' süogo, ta metetdaksü.

"Ni Modi dang kanga metsübuttsü mepishir," ta Rai-i

ashi. Delhi nung excise policy ochimashi ken o dak sendakba nung Amongnü nungi tenzüka tang agi tanabenbuba CBI-i Sisodia dang asüngdangyatsü tenzükgogo.

Amongnü Sisodia-i Raj Ghat semdanga Mahatma Gandhi nem akhüm agütsüba sülen CBI office-i ao. Iba jakdang Sisodia-i osangbenertem dang, jail-i aitsü pai metsübur, ta metetdaksü.

Raj Ghat nung osangbenertem den jembidang Sisodia-i, "Ni jail nung aiben puoktsüa akok, saka ni ni journalist mapa toktsüba mapang nung kinüngtsüi ni nungita liasü aser tanüa ozü kibong kü den lir. Ni apu yonga party nung inyakertemi ozü kibong

anepalutsü," ta ashi. Deputy CM, Sisodia-i education portfolio-a repsema abener aser iba dak sendakba nung pai, kaketshirtemi meranga azüngtsüla, ta ashi.

"Ni kaketshirtem dang meranga inyaksü aser maneni lesson meranga azüngtsü ajungshir. Ni jail nung puokyonga ni kaketshirtem jenjang asadangtsü," ta pai ashi.

Excise Policy ochimashi ken o yaküm November 25 nü benoka liasü, iba jakdang October 17 nü CBI-i Sisodia dang asüngdangyaa liasü.

Delhi nung Arvind Kejriwal-i aniba sorkari benokba excise policy kübok yi ayoktsü atema sübokrem agia kar nem licences agütsü, ta tai tongloksür, ajisüaka AAP-ibo parnoki aibelena mali, ta ashir.



Feb. 26, 2023 : liquor policy ken o dak sendakba nung ken o ashishitsü atemaRajghat ajanga CBI office-i aoba mapang Delhi Deputy Chief Minister Manish Sisodia tangokba noksa nung angur.

Karnataka ya India linük tanela lir: PM Narendra Modi

New Delhi, February 26 (Agencies): Assembly election agitsü aliba state, Karnataka semdangtsü jelia Ato kilonser, Narendra Modi-i, Karnataka state ya India tanela aser iba state medenibo linük indang rateta ashitsü makok, ta ashi.

New Delhi nung 'Barisu Kannada DimDimava' sobaliba benjungmong sentong tenzüksüba sülen jembidang Modi-i, "India maitsü, sobaliba aser tajungshibatemi Karnataka-i inyakba shilem medenibo rateta ashitsü makok," ta ashi.

Iba sentong nungsa Karnataka Chief Minister Basavaraj Bommai aser Union Minister Pralhad Joshi na denema lenirtem aika liasü.

"Akhidang bendangertem yimsüsüba mapang state nungi Devara Dasimayya, Madara Chennaiah, Dohara Kakkaiyah aser Bhagwan Basaveshwara nungi yimsü dak sendakba nung shilem agia liasü; yamaji bendangertemi yimsüsüba mapang Rani Abbakka, Onake Obavva, Rani Chennamma aser Krantiveera Sangolli Rayanna nungeri bendangertem anema rara. Linük nüchiso anguba sülena Karnataka nungertemi maneni India


ajungmeso," ta pai ashi. Honibarnü Ato kilonser, Modi-i Germany Chancellor, Olaf Scholz den senden amenba sülen tasüngnü pai Bengaluru semdangtsü aliba atema pelar, ta ashi.

Linük atema Karnataka maneni renloksüji tongtibang, ta shia Modi-i, "2009-2014 tsüngda Centre-i (taoba mapang UPA sorkar) Karnataka nem sen crore 11 dang agüja liasü saka 2019 küm nungi 2023 küm tang tashi nung onokibo state dangi sen crore 30,000 yokogo," ta ashi.

Tang aliba sorkari mapang talangka nungi akhangba Bhadra Project ataloktsür aser lenla balala nung kanga terenlok aliba ajanga Karnataka melenshir, ta pai ashi.

Hombarnü Ato kilonseri Karnataka semdangtsü aser iba mapang nungi pai Shivamogga Airport semdangtsü. Iba sülen pai Shivamogga nung project balala semzüksütsü aser project kar atema foundation lung azüngtsütsü.

Modi-isa Belagavi nunga project balala atema lung azüngtsüba den project kar semzüksütsü aser PM-KISAN kübok 13buba instalment agütsütsü.



Feb. 26, 2023 : Congress lenir Rahul Gandhi-i, 85buba Congress' Plenary session tasembuba anogo Nava Raipur nung o jembiba noksa nung angur.

Jammu & Kashmir kübok Pulwama nung Hindu nunger ka khaset

Srinagar, February 26 (Agencies): Amongnü South Kashmir kübok Pulwama district nung kiralongrartemi Hindu nunger ka khasetogo, ta ketdangsertemi metetdaksü.

Asürji Sanjay Sharma liasü ta jangjaogo.

Amongnü anepdang yakta kiralongrartemi injang khaloktsüdang nisung kata yiru; paji bank nung tanüker sepai liasü.

Kasa lendong nung asüsangji Kashmir nung Hindu minority nungi liasü. Iba tatalokba sülen sepaitemi temem ajakji longbangba sülen

aibelenertem bushidar. Jammu and Kashmir nung Arlla 370 agienba mapang nungi tenzüka mapang shia Jammu & Kashmir nung Hindu Pandits aika tepsetdar.

Relief and Rehabilitation Commission (Migrant) Jam-mu website ajanga ashiba agi, "Tensa majungba ajanga tang tashi nung Hindu nunger teimba sür kibong 60,000 shii Kashmir Valley toktsür ogo. Kibong teimbaka Jammu aser telongtet nung aliba tesemtem nung jenokogo aser kibong 23,000-i J&K toktsür ogo."



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :

f Tir Yimym

Instagram tiryimym@aolima

YouTube tir yimym

TAPAK 2

Macron-i China semdangtsü; Xi dang teyari meshitsü

Denmark Crown Prince Frederik André Henrik-i India semdang



VOL. XX NO. 136 (ADOK 136) DIMAPUR TENTONÜ (MONDAY)

TSÜKLAI (FEBRUARY) 27, 2023

₹ 5.00

CEO Nagaland-i democracy tangatetba nung shilem agitsü ayongzüker

Dimapur, February 26, 2023

(TYO): Nagaland aliba senso ajaki Nagaland Legislative Assembly 2023 indang General Election nung pei indang vote enoktsütsü mapang tonga aruogo, ta CEO, Nagaland-i ashi.

Iba election ya democracy tangatetba chichiba nung agidi aser DEO's, RO's, ARO's, Polling Officials, Law Enforcement Agencies, Election Officials aser Voters ajak moatsür ta V Shashank Shekhar, IAS-i sangdong ka nung ashi.

February 27, 2023 anepdang 7:00 ako nungi polling tenzüksü

aser nikongdang 4:00 ako nung tembangtsü. Vote enoktsür ajaki tetsübu mesüra tarendaktsü kecha melii dang nü temeten amshitsü mepishir, ta paisa metetdaksü.

Election tiptema agitsü atema polling mapang tim masüba, meinprong mesüra ozüing alema inyaksangshi kecha malitsüla. Nai teyari nüngdakra nü polling station nung BLO den tongtepang ta CEO-i ashi.

Maneni, Presiding Officers aser Polling Officers ajaki polling station aser temeket nung ozüingi melaba ama inyaksangshitsü mepishir, ta paisa shisem.

Nagaland assembly elections tiptema agitsü atema arrtsü ajak shibangogo

Dimapur, February 26, 2023

(TYO): Nagaland sorkari assembly elections agidang tangalen nungi timtem agütsürtem mesüra osettsüset bener marudaktsütsü atema arrtsü ajak shibangogo.

Nagaland-i tanga state tem den arrtsü ajak shibangogo aser iba ya Election Commission of India (ECI) Standard Operating Procedure (SOP) sülen anidaka inyakba lir.

Wokha, Mokochung, Dimapur, Noklak, Meluri, Chizami, Zunheboto aser Phek nung election dak sendakba lendong-tsyüdong ataloktsü ta bilemba agi 'sensitive areas' ta sangoktsüogo.

February 25 nikongdang nungi tenzüker February 27 nikongdang tashi tanga state tem den arrtsü nung check posts ajak shibangogo.

February 25, 2023 nü ketdangsur telok kati Wokha district semdanga tensa osang asadangogo.

"Nagaland nung security akangshio go aser district balala nung Central Armed Police mapa lezmüksüogo" ta Director General of Police, Nagaland Rupin Sharma-ia ashi.

Paisa nübortem dang nisung kari danga ozüing alema mapa inyaktsü merangba putetra police nem osang sangoktsü tayongzüka agütsüogo.

Wokha nung nisung ka tsükset, 12 yiru

Dimapur, February 26, 2023

(TYO): February 26, 2023 nü Wokha district kübok Thillong Bridge, Doyang nung election duty atema aoba gari ka kanga mejungi tsükok.

Gari nungji polling security aser personnel mener 39th Sanis A/C kübok Sungro Sector, PS 4-i aodang lendongji atalok.

Iba lendong nung nisung ka asü aser 12 yirua lir ta osang

angazüker.

Teyirurtemji District Hospital Wokha-i anir ogo aser Wokha headquarters nungi reserve polling personnel nungi polling personnel telok tasen ka den polling materials/machinery bener yokogo.

Nüngdakra reserve nungi EVM machines melentsü ta Deputy Commissioner & District Election Officer, Wokha Ajit Kumar Ranjan, IAS-i ashi.

Dimapur nung kitsükkirong lendong tulu ka atalok

Dimapur, February 26, 2023

(TYO): Dimapur kübok Master Colony, Kuda village (D. Khel) nung Honibar aonung kitsükkirong lendong tulu ka ataloka kibong 80 shi talidak maka kümogo.

Honibar aonung 7:00 ako meta ki ka nung mi lendong atalok aser kabi melii tanga kitem nunga miji kaoloka arong. Iba lendong nung ki 20 tema mitsü küma rongdok aser kibong 80

shi talidak maka aküm.

Iba lendong ya komaser atakok'ar mejangja aser bushisügangdang südar. Mi azüoktsü atema mi ensepertemi fire tenders tenet tashi bener oa yaritep saka LPG cylinders aika apokba ajanga ghonda 2 shi ka nung ang miji remsepteta liasü.

Ajisüaka, iba lendong nung nisung asüba mesüra yiruyibong asüba osang kecha mali.

Nagaland nung tanü nisung meyrjang 13 temai vote enoktsütsü



February 26, 2023 nü Mokochung nung polling ketdangsurtemi EVM Machine, VVPAT aser tang osettem bener pei pei polling stations-i aoba noksa nung angur.

Kohima, February 26, 2023

(TYO): Hombarnep 7:00 nungi nikongdang 4:00 ako tashi Nagaland nung nisung 13,05,339-i pei temeten vote enoktsütsü.

Tetsür 4 dena candidate 183-i Assembly Constituency 59 nung tokteper. Zunheboto district kübok Akuluto A/C nung BJP candidate aser MLA teinyakdak Kazheto Kinimi den tetokteper shinga melii takok nguogo.

Vote enoktsürtemji tebur 6,47,523 aser tetsür 6,49,876 lir aser ano service voters 7,940 lir.

Assembly Constituency 59 kübok polling stations 2,291 nung parnoki vote enoktsütsü.

Polling stations 720 tashi vulnerable, 777 tashi critical polling stations aser 794 tashi normal ta lemsaa lir.

Polling stations 387 tashi women polling stations lir aser Persons with Disabilities (PwDs) ajanga polling station 3 ketdangsiä reprangtsü. Itemji

Kohima - PS 14 Chotobosti, Tuensang - PS 9 Bazar Sector 'B' aser Zunheboto - PS Old Zunheboto lir.

Nagaland nung election tiptema agitsü atema Central Armed Police Force (CAPF) company 305 aser state security force 11,000 dena 15,000 personnel mapa lezmüksüogo.

Voters tajemtiba aliba Polling Station ji 40 Bhandari assembly kübok 71-Merapani lir aser iba station nung voters 37 dang lir. Külen, voter teimtiba aliba polling station ji 32 Atozumi constituency kübok 12-Usumomi Polling Station lir aser iba station nung voters 1,348 lir.

Assembly Constituency rongnung voters teimba alibaji Chumoukedima district kübok Ghaspani-1 A/C (voters 74,395) lir aser tajemtiba alibaji Mokochung district kübok Mokochung Town A/C (voters 8,302) lir.

Candidate tem rongnung

political party 12 nungi nisung 164 aser Independent candidate 19 lir.

Nationalist Democratic Progressive Party (NDPP) nungi candidate 40, BJP nungi 20, Naga Peoples' Front (NPF) nungi 22, Congress nungi 23, Lok Janshakti Party (Ram Vilas) nungi 16, National People's Party (NPP) o Nationalist Congress Party (NCP) nungi teranana (12), Republican Party of India (Athawale) nungi 8, Janata Dal (United) nungi 7, Rashtriya Janata Dal nungi 3 aser CPI o Rising People's Party nungi kaka (1) lir.

Maneni, tetsür candidate pezüji- Congress nungi Rosy Thomson, NDPP nungi Hekhani Jakhalu, NDPP nungi Salhouuonuo Kruse aser BJP nungi Kahuli Sema nung lir.

Roxy-i Tenning A/C, Hekhani-i Dimapur-III A/C, Salhouuonuo-i Western Angami A/C aser Kahuli-i Atoizu A/C nung tokteper.

PM Modi-i Meghalaya aser Nagaland indang sü sempet agütsü

New Delhi, February 26, 2023

(Agencies): Prime Minister Narendra Modi-i Honibarnü German Chancellor Olaf Scholz nem Meghalaya aser Nagaland indang sü tabentsü sempet agütsüogo.

Meghalaya indang sü ajanga putu aika indang putiotsü aser chubar jakzükbaren otsü ashir. Parnoki sü atakba ya alemli nungi benshia aruba inyakyim ka lir aser putu melentepa arur, ta ketdangsurtemi ashi.

Meghalaya nung sü ya shitakba nungbo Khasi aser Jaintia chubar kibongtem asoshi amshi. Parnoki sü ya benjungbentsü nung apen aser design o sentsü balala ajanga chubar kibong indang rongsen aser jenjang sayu.

Khasi aser Jaintia chubatem item sü ya tanga chubatem nem sempet ama agütsü ta ketdangsurtemisa ashi.

nung sü ya textile art tapu balaka lir aser Nagaland nung putu aika kin balalai taka arur.

Naga nung sü ya sentsü aika, designs balala aser alemli nungi benshia yimya agi ataker.

Naga nungeri kin ka indang otsü, tar nungeri otsü aser tamangba nung ajemdaker sü ataker ta ketdangsurtemisa metetdaksü.

Northeast kübok Meghalaya aser Nagaland nung February 27, 2023 nü assembly elections agitsü lir.

PM Modi-i India nungeri sobaliba dak sendakba osettem sempet agüja arur.

Dimapur nung CrPC indang Section 144 benokogo

Dimapur, February 26, 2023

(TYO): Election Commission of India-i tuyuba ama Dimapur nung election tiptema agitsü atema Criminal Procedure Code (CrPC) indang Section 144 benokogo.

Dimapur district nung

election dak sendakba lendong matalokdaksütsü atema security nisungtemi kanga dang akangakanga mita anüker.

Nagaland assembly election magidang tesem kar nung lendong atalokogo. Honibarnü nikongdang tesü Wokha district

nung mejangjaba nisung kari NCP pusemer ki ka raksatsü.

Ano, Dimapur II nung NDPP candidate Moatoshi'er kima nung mejangjaba nisung kari injang khatok. Osang angazüka agi mejangja nisung kar gari ana nung aru aser injang aika khatok.



TIR YIMYIM

YIMOBILEM (EDITORIAL)

DIMAPUR TENTONÜ, TSÜKLAI (FEBRUARY) 27, 2022

Tayok asü angati ?

Tanü asenoki asen melen tatar senden nung jembitsü aser asenok taküm nungdak reprangteta inyaksütsü asoshi tatar yimsüsür shimtsü. Iba tashi ya koda tulu aser koda jangratemtsüka ! Iba yagi nübortemi yimsüsür shimba yimtenren democracy nungbo yimsüsür dang nungibo nübortem tashi tuluba ta sayur, kechiyong yimsüsüsübaji yimsüsür mulung masü nübortem mulung kümdaktsür. Iba jagi tatar senden nung telemtetba agiyonga, shitak mesüra nübortemi agiendaktsür. Ibaji democracy ajanga nübortem nem agütsüba tashi (power) lir. Iba tashijibo kecha jenjang agia alitsü makoktsü. Ajisüaka, asenok aikati iba tashi aser jenjangji memetet ayoker, anungji asenok dak aketba yimten tashi tuluka oadoker. Iba tashi (power) indang bilemdang dang, Samson dak aketba tashiag bilemteter. Tsüngremi pa nem tangar ajaki akhümtsübuttsüa tashi tulu agütsü saka pai iba jenjangji memeteti tedong Delilah dang shi azü meimbayong ayok, iba jagi tashi tait nisung to tashi mait kümer, tangari mezügmeshitsü tenzük. Kasaji asenoki asen dak aliba democratic temeten aser tashi tulu ya yokra, election temer asenok tashi mait akümtsü. Kobanü, kong aser kodang shiba dang asen vote yokdir, idangjisa asen dak aketba ain tashi tuluka oadoker ta bilemdi aser idangji Samson o Delilah na bilemtetangma. Asenok taküm alir taintem asoshi tanü vote agütsüba anogo ya asen arishi nung kanga tongtibang anogo ka lir, kechiyong ibai asen dak aketba yimten ain aser tashi amshiba anogo lir. Iba tashi aser ainji amshia nübör tenzüksü asoshi temsüa aliba nisung ka yimsüsür shimtsü melen asenoki asenok dak aketba ain aser tashiji senyong mesüra mapa ka yong yokadoker lira, tashitait aser akhüm taket Samson to yimdang nung tanur katia mezügmeshitsüa kümogo ta bilemang. Asenok Naga nunger aser talisa Ao kin ya meshimetsür kin masü, makayonga arema meshimetsü mesüi meranga inyaka peisasa pei taküm aser kibong liteta aruba kin aser nübortem lir. Ibajiang shitakba asen sobaliba liasü. Iba jagi Tsüngrem pela südi aser asenok mesamadaktsüi kümzük südi. Iba ama kin ka nungi jakzükba nisungi tanü election nung candidate dang pei vote yoka achitsü maker. Item jagi kibong ajunga vote ayoker. Itemji kodang bilemdangdir, asenok asoshi election ya alima tatembang asü ta bilemer, kechiyong election nung vote enoktsür sülenbo asenok ola kecha maka kümadoktsü. Aji oda, election mapang vote ayoktsü merangdang khen tangari asenok akhümtsübur amai sayutsü dang ashi, vote yokadokba sülenbo asenok ya bazaar oset ka amaidang kümadoktsü. Shitakba agi, asenok sobaliba dak aketba yimten yimli aser tashi amshidi asünungbo asen yimtak mesüra asen alidak senso shiai pei vote tangatetba agi pei agütsünüba nem angati agütsütsü asoshi putu yimsüsürtemi yimyim ka agütsünü nung teperi asütsüla. Ajisüaka, putu yimsüsürtemi anir pei vote sen aser mapa yong yokadokra, shibai yimyimji ayimtsü ? Ibayongji, tanü election nung candidate-temi sen amshiba aser nübortemi pei vote ayokba anema yimyim ayimer mali kümogo. Aji oda, tanü asen lima yabo temzüng ozünga maka ama pei sünütsü asüba aser pei inyaknütsü inyakba lima ka kümdokogo. Ibai amai asenoki asen vote ayokba ya tangatetba agi manenra, oda oda asen lima nungbo government school aser mozü ki ajak ya nija meyong kümadoktsü aser itemji yoker election-i aitsü. Tanübo item ajakji nükla dangi arua, asenok pei pei vote agütsüba mapang, nia shiba nem kechi atema kü vote enoktsütsü ta peisasa sarasadema asüngdangdi. Aji oda, kü vote yagi adokba nisungi ozü lima agi ni nümadangtettsüsa yanglutettsü asü (?) ta asüngdangdi. Election nung asenoki asen vote agi yimsüsür tajung meshimtetetra, tanü lanurtem aser chirnurtem asoshi tarutsü tia raksatsür dang asütsü. Tanü asen lima nung kecha manguba ya koda ? Education asüyonga taneptsü asüyonga asenok tangalenidang bushia aoer. Joko asen lima yabo vote ayokdak aser nübortem meyong rongsen auyadak tesemang ka kümogo. Asenoki tanü ama election nung ya candidate-tem dang nungi agiba sen ajak meyiptsür, shitakba nübortem tenzüksü shisatsü adenba aser temetetba aliba nisung ka tangatetba agi angati shimra, asen lima tamajung agi tajung kümadoktsü. Idangjibo asenok aotsü masü tangar asen lima bushia taneptsü aser kaketshisatsü tajung aginüa arutsü aser asen lima topur ajung reprangi arurtem kisüngi bendentsüba rongsen agi asenok anisüngzükba alitsü. Joko, asenokbo vote-bosa meyokli aser malili. Idangji dang asenoki asen lima renloka aotsü atema mapang tajung ka tenzükttetsü. Tanü asenok vote agütsüi aodang, ano khen asenok ajaki asenoksasa asüngdangdi," nia kü vote ya ayok asü ? Mesüra tangatetba nung sarasadema angati agütsür ?

OLEMSABANG

AOR ASER ELECTIONEERING POLITICS : OLEN KA

- Akok Walling

Aluji ayimer, Tongpangji azü tokshia rarar, Yimsüji amanger, kenji atener. Inyakyim maparen ka den putepa, teinyakba ojang (action word) ji külem külemi metentepa amshir. Politics ta kodang shidir iba maparen den metentepa amshiba teputep ojang (action word) ji ASAYA ta aüba ojang ya lir. Politics ji rarar ta mejembir, amager, atener, soror, ta mejembir. Politics-ji asayar. Asaya ta süra ibaji saisapong sports ka amai lir. Saibaji Whistle apur tenzüksü aser whistle apur mesüra takok tamakok lemteter tembangtsü. Saidangji takok tashi tokteptsü, tashi ajak agi tokteptsü, tai temeten bushia tokteptsü, ozüng raksaa toktepra tapet temerenshi ngua saitsü. Kodang saibaji tembangdir takoker o tamakokerna salem süteper senshir. Tanübo na o pa na tokteptsü ashiko asüngbo na o pa na külem sür tangar den toktepa saitsü akok. Politics play asüba nungjia yamaji sair. Lenir-tenzüker shimba (electioneering) politics-ji tongpang ama azü tokshia rarara, ibaji politics timi mamshiba. Electioneering Politics ji yimsü/Tsüngrem ama külemra ibaji politics meshi-asayaba. Politics ji saisapongba tanela ka nung asayatsü koda tajung. Tasayaji shia asayayara jangratemtsüka aser tajinetsüka südiko. Saisapongba nung nügkjitong agi, asaa tasa asar azü metokshiteper, meyirutepdaktsür, kitsük kironng mesütsür. Mesülim tsüekhi metenteper. Kari tim mesüi anayara parnok dang asaya mashir ta ajar. Alima kintem saisapongtsü Olympics sentepdang kintemi pei kin asayartemji tasayadaki yoker külen rarateptsü nok-o-nü, defence department renemteper anidakba munguka. Aoerianir electioneering politics-ji asaya shia asayara alima koda tobur junga renloktsü!

Idagi kechi züluogo iba ya Aor aser electioneering politics teshisadangba nung olen ka dang. Aor ji maor masü aor aser aotsü. Achijileni ora Aorsa Aor.

MAPA TAJUNG INYAK MEDEM, SAKA MABENSA LIASÜ

- Senti Tzudir, Tizit Town.

Tanü Naga nunger tem rongnung Chuba yimli menden ososhi toktepba mapang ka nung nai-a koma lemtet agiteter, kechiyong iba lemtet ji bo nai aser ne dang lemtet agitsu. Iba dang ji free and fair election ta ajar, Taküm February ita, anogo 5-7-2023 ABAM küpok aliba Ao Baptist Pastor fellowship ajanga Sannüker telungjem Guwahati (Assam) nung Dt. 25-27 January 2023 tashi koba angazükshiba Sentong agia liasü. Iba sentong akadang parnoki lemtet ka agi. Aser aji tanga kecha masü, saka asen Mokckchung Town, Yimti ba nung senteper Clean Election Nükjidong atalokdaktsütsü omen nung rangloker koba lemtet agir ayongzükba, Rally ka aki-ogo, ibaji kanga junger ama belemego südi. Saka kodang iba sentong akaba mapang yimtung süa Ken tena aser Serasadema jajago, iba indang ji kodang kanga junga asadangdir Süngjang tajung atangba tamaitso kar bo ngütet asü mengütet?Asen Aoer shin O ka nung yamai lir, Waru or tempang akoshiya ta jempir. Hao aikati iba ji kanga tongtipang ta bilemogo südi. Asenok Local Arogotem indang tia kodang asadangdir, külem Ao Baptist Arogo bo Ao Baptist Arogo sa. Saka kodang Aoli Sannüker telungjem indang ji kanga junga shisadangdir, Parnokji parnoki parnok meyong ita sen ji agütsür masü saka pei pei saseb Local (Lim) Arogotemi parnok nem ita sen aguja ayuba tenzüker tem lir. Arogo tolu, takar Arogo tem asoshi bo sen otsu nung kanga bo timtim mali. Saka ya angatetdi, meimchir temeyong Pongu memedem ama Arogo ajak bo Rongsen kettsung Lemang arulen ji kodanga küsa bo masü, Aser Naga limaji Christan lima, aser NAGA LIMA Nükjidong ji Nagaland for Christ. Saka asenok ji India bo India nunger küpok sa alir asünung, Centre Sorkar Directive (Ozüng) nung State Government-ikodanga Christian tem aliba State nung Arogo asoshiyo Budget plan i meyokteter (ibaji Centre policy) saka Arogo ji pei je-jang aser tangatetba yari. Takar tema pa akaba yari, aser maka maiter temia Arogo ji Arok meyong ta asüba tangatetba nung tazü merang meranga Arogo lokti ji ter shilem aser temoatsü tenla agütsüba ajanga Arogoji abener.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Yirusalem nung archaeologist temi kanga aritepa bushisüngdangder



Yirusalem nung 'Pilgrimage Road' noksa nung angur.

February 26, 2023: Tang Yirusalem yimti nung Temple Mount anasa temeshi aini aoba lenmang ali tua bushingdangdar; Israel nung kanga nungtugu archaeologist temi mapang arishia kanga mazüngi tesem 14 nung ali tua puti otsü bushir.

Israel Antiquities Authority (IAA) nungi Jerusalem Region archaeologist, Yehiel Zeligier-i, "Tang Yirusalem nung onoki tesem 14 nung ali tua bushisüngdangdar. Israel tesem balala nung ali tua bushisüngdangtsü register süa aliba tesem 30,000 lir," ta metetdaksü.

Tesüiba küm 10 tsüngda tongtibang project rongnung kaji, Yirusalem yimti nung aliba Jerusalem's City of David National Park area nung aliba temeshi aini aoba lenmang ya lir; iba ya küm 2,000 tejaklen nungi aliba lir, ta amanger.

Pilgrimage Road dang ya 'Steeped Road' taka ajar.

Iba lenmang ajanga anüdoklen Yirusalem nung Siloam tzübo aser Temple Mount na sendakteper. Temple Mount aser Dome of the Rock den anasa aliba Al-Aqsa

Mosque ya Islam yimsü nung temeshitiba tesem rongnung jenjang 3buba nung lir.

Pilgrimage Road excavation project atema American tech industry aser gaming industry titans densema nija telok aikati tenla agütsür aser taruba küm ana tashi nungbo public nem iba lenmang lapoktsütsü sentong lir.

Herod Chuba mapang nung yimsü dak sendakba benjung balala nung adentsü atema Temple Mount tashi aotsü asoshi Pilgrimage Road ya amshia liasü, ta amanger.

Ano Siloam tzübo ya Pilgrimage Road dang nungi küm noklang aikati tama yanglua liasü. Osangtajung kaket Yohan nung iba tzübo nung Yisu Khristai nukpoker ka aneptsüba indang otsü tejangja shia lir.

Tang Jerusalem district nung archaeologist 80 dak temai iba tesem nung akhi nüngo osettem bushia ali tua bushisüngdangdar. Tang tashi nung parnoki senjang, ali chipo aser senti oset aika bushitetogo.

Pilgrimage Road ji lenden nung tasazük metre 8 aser Siloam tzübo nungi Temple Mount tashiji metre 600 talang

lir. Iba lenmang tiplenji kilentzü aotsü atema 'drainage system' yanglua lir.

"Akhi otsü bushisüngdangtsü atema tongtibangsüa onoki ali agi yangluba chipotem amshir. Iba ya jenjang temelaba aser putu aika amshia liasü. Küm 4,000 tejaklen nungi nisungtemi ali chipo nung dang sorochoka liasü. Küm 500 tejaklen aser küm 200 tejaklen amshiba chipoji tera balala," ta Zeligier-isa metetdaksü.

Archaeology nung timtem tulutibaji, nai tesem kaji khen dang tua bushisüngdangtsü akok, kechiyong ali khen tua bushisüngdangba mapang nung tesemji raksar, ta pai ashi.

Nüburtem aser raliwalirtem nem Pilgrimage Road melapoktsüdangsa ano lenmang metre 300 shi nung ali tua bushisüngdangtsü nüngdaker, ta pai ashi.

North Korea nung Khristantem labour camp-i yoker aser tepseter

February 26, 2023: North Korea nung Khristantem anema ano tesashiba apusoa underground churches bushia tamangertem tepseter, labour camps-i yoker aser tepseter, ta melungtet teloktemi osang ka ajanga metetdaksü.

Alima nung reshikangshiba Khristantem yaritsü atema tentetba melungtet telok, Open Doors-i, tesüiba küm North Korea nung Khristantem anema inyakba kanga bulua akümba osang parnoki bendenogo, ta metetdaksü.

Open Doors-i, "Tatalokba ka nungbo, underground churches nung adener North Korea nung Khristan kibong aika putetba sülen tepsetogo. Kibong aika nungi züngsem 100 dak tema longbang aser labour camps-i yok," ta metetdaksü.

Open Doors nungi Asia

researcher, Thomas Müller-i, 2021 küm October ita nungi tenzüka 2022 küm September 30 tashi nung Khristantem pua labour camps-i yokba mesüra tepsetba tatalokba 9 jangjaogo," ta metetdaksü.

Item osangji North Korea nungertemi miima metetdaksüba osang tejangja lir, ajisüaka nisung kwi tepsetar osang tejangja memeteter, kechiyong Khristan kibongtemji ayaterm nung ang teimba puer aoer, ta pai metetdaksü.

Tang North Korea nung miimshia amanger Khristan 200,000 nungi 400,000 shi lir, aser parnok teimbaka anüolen tsütsü lir.

Kim tebou, Kim Il Sung yabo Khristan ka liasü ajisüaka par jabasoi iba tsüngsü nungji manidakba yong linük nung Khristantem reshikangshir.

ANO GO ABEN TSÜNGREM DEN

Nai Lemsateptsü Asü ?

T. Ken 67:1-7

Iba ken zülur memetet saka alima rangpen mangdang akar kati iba ken zülu. Tsüngremi Pa moatsü, aser Pai iba temoatsüji ajak den lemsatepnü. Pai zülu, " Tsüngremi onok dang aochiang aser onok moajang, aser ne tejak onok dak saklokdakjang"(t.2). Ibai putir kati moatsüba osü mesüker. "Kibubai Pa tejak ne dak yalokjang, aser ne dang yimlibilemang"(Züng 6:24,25).

Tekong 2 nung ken züluri "onok" asembeben tashi amshi. Pai Yihuda nung indang ashi, saka idakji matem. Pai tekong 3 & 4 nung kintem amshi. Tejen Lai nung Yihuda nungeri Tsüngrem moatsüba parnok atema dang ayutsü aikati bilem. Parnok imelemsatepnü. Tsüngrem sentong memesük ! Kechiba Pai Abraham aja ? Alima ajak dangi osangtajungji aotsü atema. Kechiba Yisu asü? Osangtajung osang alima ajak dangi aotsü atema.

Kechiba Kibubai asenok moatsür? Asenoki osangtajungji tangar den lemsateptsü asoshi Tekong 2 nung sarasademba ama sarasademtsü asenok kecha tebilemmsü mali: " Tsüngremi onok dang aochiang, aser onok moajang, aser ne tejak onok dak yalokdakjang." Nai tangar moatsütsüsa na temoatsüba süner asü? Tsüngremi asenok tama moatsüba kuliji aji lir. Kar sarasadem langzür asenok asütsü asoshi Tsüngremi asenok sarasadem langzür.

Kin ajak dang Tsüngremer tekümtet metetdaksüba nungi adokba mapaji tenüng asangbaji lir. " kintemi Na sangdakjang, o Tsüngrem; kin ajaki sangdakjang"(t.3). Iba tetezü Israeli dang masü. Bendangertema dena lir. "Kintem peladakjang aser tepela agi ken tendakjang;"(t.4)."kintemi na sangdakjang(t.5)

"Idangji alui pei terenlok süngjang tangogo. Aseni Tsüngremi asenok moatsütsü" (t.6,7). T.ken züluri ashir, "Kibuba, ni tangar moatsütsüsa ni moajang". Pa tangar asoshi temoatsü aküm, anungji koda tesüngmangtsü.

Na Tsüngremi moatsür rongnung ka asü? Nai lemsatepra, na temoatsü ka asütsü Tsüngremi moatsütsü. Pa indang tangar dang ashiba ajanga Pa taochi metettang.

Roma Downey-i 'Be an Angel' kaket saya



Roma Downey & Mark Burnett

February 26, 2023: Emmy award atema nominate süa alila actress aser nungtugu kaket zülur, Roma Downey-i lai züluba kaket 'Be An Angel' sayaogo.

Iba kaket azüngba ajanga nai kibong züngsem kar, kiyonger aser tangar dang temeim sayua nüburtem taküm nung tesangwa agüjang, ta lai ayongzük.

Be An Angel kaket nung Roma Downey-i la taküm otsü, taküm kuli aser hopta 52 azüngtsü Lai otem lemsatepa lir aser kaket tapu tatembangbuba nungji tangar atema kodak tenyar ka ama alitsü lemsatepa lir.

Tawa interview ka nung jembidang lai, "Nai tangar ka atema kechi inyaktüsü. Nisung kar dang temeim tera sayutsüla mesüra langka tajung kar

inyaktüsü," ta ashi.

1990s mapang TV series "Touch By An Angel" nung lai küm ter shi kodak tenyar shilem agia liasü aser tang tashi lai Yisu Khrista dak nungi teimla anguba lai lemsateper.

"Nai nü taküm nung Tsüngrem ajangshira aser Kibuba den tesendaktep yura nai ibaji nisung ajak nem metetdaksünütsü. Iba ya taküm nung temelenshi tulu. Iba ya asen taküm nung anü tasen adokba amai lir aser atangji asen Tsüngrem ajangba tesüngmangtsü aser Pa temeim nai angatettsü," ta lai ashi.

Wara anema lockdown mapang nung azüngmeyakba densema taküm lenla balala kongshiba sülen nisungtemi pei sasa pei angatettsü pei taküm

asadanger, ta lai ashi.

"Ni züluba kaket ajanga asenok ajak dang ya nenshia metetdaksür. Nai ner kiyong nung shiba meteta lir? Pei kija alir kar meteta ali asü, tantsürtambur kar kija aliba meteta ali asü? Na ner kidangi meyipa aoba mapang nung nai dokan nung langka alir parnok nem agütsütsü asü?" ta la ayongzük.

"Item mapa inyaktüsüji kanga temela. Iba ya tekolok surgery agiba ama masü. Temeim mapa sayuba ajanga langka tajung adokdaksütsü," ta lai ashi.

Downey-i, "Tsüngremi asen taküm amshidi süra Pa asen tejakalen asütsüla. Na tejaklen asütsü makok, kechiyong ibaji ajanga tanela temeshi nokdangtsü," ta ashi.

Be An Angel kaket nung Downey-i lai ajangshiba otsü aika lemsatepa lir; tangar nem agütsütsü atema la ajangmesoba, Yisu Khrista dak tamang akaba ajanga tayongzükba balala koktetba aser tangar dang temeim mapa sayutsü aser aria bilemmsütsü ajangshiba lemsatepa lir.

Downey aser la kinüngbu, Mark Burnett nati 2013 küm series "The Bible" sayaa liasü aser ibaji nisung million 100 dak temai repringogo.

AO OSHI ANGAZÜKDAK:
TANÜ ANGAZÜKTSÜBA OJANG



Paiga

(adj) tatakzük ka sayuba (this much)

* Nisung **paiga** ya arutsübo meimlai liasü.

Paila

(adj) aika agütsür ta ashiba (so much)

* Ozü dak malangba rongsen **paila** ya agütsür na ?

OLONG PAITEP # 6441

15x15 crossword grid with numbers 1-15 indicating starting positions.

Two columns of crossword clues: TIPILEN and LANGTSÜNGLEN with corresponding numbers and hints.

OLONG PAITEP # 6440 TELANGZÜBA

Two columns of crossword clues: TIPILEN and LANGTSÜNGLEN with corresponding numbers and hints.



Ministerba office nung kanga tobour tajung aiür ka pa PS asütsü appoint sür külen ministerba kinungtsü Rosela Koda mali asüngdangyar :

Rose : Nü PS tasenlaji tobour kanga junger ahar ato.
Minister : Sülaba.
Rose : La tetsüngji kanga junger na?
Minister : Ashinii.
Rose : La tenükji kechi colour?
Minister : Khendanga meranglokkha ko.
Rose : Nail polish kechi coloursa ateper?
Minister : Itemji repringtsü mapang angur mahajito.
Rose : Lipstick ji komalasa anür?
Minister : Ranglok nungang angutsüashito, kong mapang ali?
Rose : La jagi süoshi koma asemer?
Minister : Onsara karaa asemer ati---oooppps, slip of ??.

Lilir : WhatsApp

Meghalaya nung BSF temi sen aika apu

Shillong, Tsüklai/February 26 (Agencies): Election agitsü aliba Meghalaya nung India-Bangladesh arütsü anasa East Khasi Hills district nung Border Security Forces (BSF) temi sen jenti pua liasü.

Meghalaya nung Bangladesh den international border ya March 2 tashi shibangtsü sangdonger anogo ka dang lir BSF temi sen ya apu.

Temolung melemi nisungtem senzüba nung ajemdaker testiiba

ghonda 48 tsüngta BSF temi operation ana nung sen jenti apu, ta BSF ketdangsur temi ashi.

Mezüngbuba nung BSF tem Indo-Bangladesh arütsü anasa Hat Thymmai tesem nung alirtemi Bangladesh nunger sen lakh 18 inoka aliba yangko ka apu.

Sen bena alisang ya arem nung jena ao, ta pai ashi.

Tanabiba nung BSF sepaitemi Ryngku yimtsüing nung sen lakh 3.12 apu, kong

international border anasa nisung telok ka temolung melemi senzüba osang lazüka liasü.

Election junga agitsü aser vote azüngba mapang timtem malitsü mechi India-Bangladesh international border ya February 24 nü nungi March 2 tashi shibanga lir.

Züngsem 60 aliba Meghalaya legislative assembly atema election ya February 27 (Hombarnü) agitsü.

Manipur examination hall nung tesayur aser kaketshirtem süchia aoba bushisüngdang

Imphal, February 26, 2023 (Agencies): Manipur nung higher secondary examination hall nung kaketshirtemi ozüing alema inyakdang kaketshir 15 aser tetsür invigilator ka süchia aoba atema sorkari bushisüngdang asütsü tuyuogo.

Hombarnü inquiry report ji bangdakpur nem agütsütsü ta Deobarnü Manipur Education Minister Th Basantakumar-i ashi.

Council of Higher Secondary Education, Manipur (COHSEM)-i acha-ayanga agiba XII class standard examinations 2023 February 23 nungi tenzüka liasü aser iba centre nung kaketshir kar atema anogo ka-ana tatidang thinentsü

ta Minister Basantakumar-isa ashi.

Manipuri Students' Federation (MSF), Democratic Students' Alliance of Manipur (DESAM), Kangleipak Students' Association (KSA), Students' Union of Kangleipak (SUK) aser Apunba Imagi Machasing (AIMS) teloktemi State sorkar dang aibelenba kaketshirtem merenshitsu mepishiba sülen sorkari teinyaktsü inyakogo, ta paisa metetdaktüsü.

Kaketshir kari Yairipok nung aliba ACME Higher Secondary School raksatsüba anema Private School Development Committee, Thoubal-i Thoubal police station tsüngdang ken o

ka benokogo.

Iba tatidang examination centre nung 144 Cr. P.C ozüing agüja liaka kaketshir kari Principal room nung computer set ka, school, desks, benches aser tanga senti osettem raksatsü.

Honibarnü tatidang nung parnoki minute pungu talila meshi saka ibaji memelaba sülen parnoki mezüing lung agi ona tenzü.

Honibarnü ACME school nung Azad Higher Secondary School, Yairipok Tulihal nungi kaketshir 409-i tatidang agütsü.

Iba tatalokba sülen COHSEM secretary Ch Biren-i school semdang aser security akangshiba sülen tatidang tenzü.

Karbi Anglong nung Rs 5 crore alang morphine apu

Diphu (Assam), February 26, 2023 (Agencies): Assam kübok Karbi Anglong district nungi Assam police-i Honibarnü Rs 5 crore tema alang morphine puogo.

Nagaland nungi aruba gari ka nung morphine ji packet 4 nung enoka liasü aser iba dak sendakba nung nisung ana pua lir.

Osang tejangja ka angazükba sülen Bokajan police

station kübok Dillai Gate nung police-i garitem mita repring aser idangji Dimapur nungi aruba gari ka sot, ta police ketdangsur kati ashi.

"Karbi Anglong police den 20 Bn CRPF personnel ajanga Dilai Gate nung gari ka soter mita repringdang driver tsütsü kishi nung morphine seret 2.013 bena aliba apu. Iba dak sendakba nung nisung ana

puogo. Assam Police nem tenüngsang agütsür" ta Assam Chief Minister Himanta Biswa Sarma-i metetdaktüsü.

Driver tsütsü aliba kishi telung nung polythene packets 4 nung morphine seret 2.13 miima bena aliba angu, ta police ketdangsurisa ashi.

Police-i gari driver aser West Bengal nunger ka puogo ta paisa shisem.

Longding district nung NSCN-K (YA) telungpur ka apu

Itanagar, February 26, 2023 (Agencies): Assam Rifles indang Khonsa Battalion-i Longding Police den külemi mita aodang NSCN-K (YA) telungpur ka apu.

February 25 nü Arunachal Pradesh kübok Chop yimtsüing nung telungpur ka lir ta osang angazükba sülen mita ao.

"Osang nung ajemdaker Assam Rifles-i Longding Police den külemi arütsü anasa aliba yimtsüing mita aodang telungpur ka den prangpong-injang aika apu" ta ketdangsur kati ashi.

Iba nisung ya NSCN-K (YA) züngsem Hongang Gangsa ta jangjaogo aser pa ya Longding district kübok Chop nunger lir.

"Pa ya Myanmar nungi aru aser Indo-Myanmar arütsü anasa aliba yimtsüingtem nung tashiyim agi sen sarutsü atema aruba liasü" ta ketdangsurisa ashi.

Longding district kübok Wakka aser Pangchao circle tem nung alirtem aser yimtsüing lennirtem amokmerenba maparen nunga pai shilem agiogo.



Deputy Commissioner, Dimapur indang office nungi polling ketdangsurtem Electronic Voting Machines aser danga osettem bener election duty atema Deobarnü ayamesoba noksa nung angur. Dimapur-I nung polling station 16 lir, Dimapur-II aser Dimapur-III shia poling station 10 lir aser itemji polling ketdangsur tetsürtemi achayangtsü.



Russia-i tashi ajak amshia Ukraine amak tenzüker kum ka ajungba nungtem nung temaitsü ka ama Tallinn, Estonia nung raksar yua aliba Russian tank T-72B nüburtemi repringba noksa nung angur.

Pakistan kübok Balochistan nung nisung pezü pokset

Quetta, Tsüklai/February 26 (Agencies): Pakistan indang Balochistan province kübok nisung jenti nungtepa aliba shishilempadak tesem ka nung bomb ka poka nisung pezü asü aser 14 yiru. Provincial capital Quetta anüdoklen mile 310 shi pilar Barkhan nung Deobarnü lendong atalokba ya telok katia tenüng agia mali, koba South Asia linük nung azüdokshi tali akumba mapang ataloker. Yangji police tanishir Sajjad Afzal-i ashiba agi, bomb ya motorcycle ka nung sendaka liasü amai ajiteter aser remote control amshia pokdaksü. Iba lendong nung yirur alirtem mozü kidangi anir ogo aser dokan aika raksaogo, Afzal-i ashi. Yirur alirtem ya Rakhni Hospital-i bener aru, ta Barkhan Deputy Commissioner Abdullah

Khoso-i ashi. "Ketdangsür telok balalai lendong atalokba tesem nungi kuli bendener aser police temi iba tesem shibangogo," ta pai ashi. Balochistan chief minister Abdul Qudoos Bizenjo-i iba bomb lendong aitsü aser kiralongrar map aka lir ta ashi. "Kiralongrar temi par temenen nükjidong ataloktsü asoshi iba ama lendong agiija tensa tamajung bener arutsür," ta pai telok ka tenünga mamshi ashi. Honibar aonung ano tatalokba ka nung Balochistan province kübok Khuzdar district ung magnetic bomb ka police mena aliba gari ka nung inoker pokdakja police ana asü aser ana kanga sashia yiru. Sorkar aser Pakistan Taliban tsungta ita aika yimjung ken o jembia aruba taoba kum anenadokba sülen

Pakistan nung azüdokshi tali akumer. Balochistan ya Pakistan indang province tulutiba lir, koba Afghanistan aser Iran den arütsüa lir aser yangji mapang shia telungpur telok balalai tenük yoker lendong agütsür. Gari aser train lenmang ajanga China indang Xinjiang province aser Balochistan nung Arabian Sea sendakteptsü sentong nung Beijing-i maparen tenzükbba anema azüdokshi timba alir. Ketdangsür temi telungpur ya azüoker ama jembir, saka azüdokshi maneni alir. Iba province nung Pakistan Taliban aser ISIL (ISIS) telok nati lendong agütsüba nguogo. Taoba kum November ita Pakistan sorkar den ceasefire aliba nungi ainshiba sülen lendong 100 dak tema agütsüba atema Pakistan Taliban tenüng asener.

Tsürabur Katemlila (Chuchuyimlang) sür kum ka abensaba anogo menungra bilemteter



Temeim Oja, Tanü anogo ya na alima talenba balala nungi nüjiso ngur teti tatem maka tepela limai aoba anogo, saka onok mulungjang aser sarasadem nung künü danga na medeni mesüidaksür. Onoki ne sarasadem taküm, kibong asoshi bendanga agutsuba, ne aria bilem shisatsü, tejungnü, mulung süngzük aser shisa taka sayubentsü O tem teti menungra bilemteter. Mangyim tejashi nung liaka, onok asoshi nai inyakba bilemtetdang onok tali temoatsü angur. Teti dang meima aliba Oja, O agi merasatetba ne temeim taküm teti onok mulungjang nung lir aser menungrar. ~ Temeim Chirnurtem, Anükapang aser Semchirtem.

Menoknok anakba sülen Turkey nung bushisüngdang tenzükgogo

Ankara, Tsüklai/February 26 (Agencies): Ita tetenzüklen Turkey nung menoknok tesashi anokdang ki aika laoba mechi nisung 600 dak tema anema bushisüngdang tenzükgogo, ta justice minister-i ashi. Minister Bekir Bozdog-i Honibarnü ashiba agi, temolung meleme alir nisung 612 nungi parnok 184 bo tepuokdaki yokogo aser ano ken o matem lir. Tepuokdak alirtem rongnung kisü-jensüba contractor aser ki kibur mesüra manager tem densema lir, ta pai southeast Turkey nung Diyarbakir nung coordination centre ka nungi ashi. "Nisung aliba ki tulu nung kuli ngutetba nung maneni ajemdaker bushisüngdang," ta Bozdog-i ashi.

February 6 nü menoknok magnitude 7.8 aser 7.6 anakba ajanga southern Turkey nung nisung 44,000 dak tema asü aser northern Syria nung nisung 5,500 dak tema asü aser iba menoknok mapang nisung aliba ki 173,000 shi laoba atema Turkey nungeri ki yangluba nung temolung malemba jembir. Tir Recep Tayyip Erdogan indang administration ajanga ki-o-jen yanglutsü atema ozüng shidak mamshitet, ta opposition telok temi tai tongloktür. Ki-o-jen chirepba indang bushisüngdang nung shilem ka ama menoknok anakba tiyong anasa jila ka indang mayor puogo, ta Deobarnü osang ka ajanga ashi. (Maneni tapak 8 nung...)

Macron-i China semdangtsü; Xi dang teyari meshitsü

Paris, Tsüklai/February 26 (Agencies): France Tir Emmanuel Macron-i ashiba agi, Russia-i Ukraine amakba tembangdaksütsü atema China sorkar teyari meshitsü atema pai April ita China semdangtsü. China-i kum ka dak tema raraba tembangdaksütsü atema ceasefire ayongzükba aser yimden yimsüsüba tsütsü ken o bentettsü atema 12-point position paper ka sangdongba sülen Macron-i Honibarnü iba osang sangdonga liasü. Paris nung agricultural show ka agiba mapang pai April ita tetenzüklen China semdangtsü ta metetdaksü. "China-i yimjung atema merangdanga shilem agiba ya kanga tajung lir," ta France nunger leniri ashiba den Russia-i Ukraine amakba anenba den sepaitem anienba aser Ukraine indang litsü aser nüburttem akümtsübo nungdang yimjung bener

arutettsü, ta shisem. "Russia nongshitsü atema China-i onok nem teyari agütsütsü nungdaker, ajita asünung dang parnoki chemical mesüra nuclear hadirtem kodanga mamshitsü... aser sensaksemstsü atema rara anena atatsü nungdaker," ta pai ashi. China-i Russia den tesendaktep tajung ayuba den India nung G20 senden nung rara aija külem sangdong ka sangdongba nokdangtsü atema teyari agüjaka iba rara nung China-i telok ka danga bu mesümei aruogo. China-i parnok telemtetba onük 12 ya rara tenzüker kum ka ajungba anogo sangdonga liasü aser, rara ajanga shinga majangzükler ta shia Russia aser Ukraine na takaratiba nung sensaksema mangatetep bentettsü atema telok ajak dang teyari agütsütsü ayongzükba liasü.

Foreign ministry-i sangdongba onüktem nung China-i anüolen aliba linüktem dang Russia nem tenokdangba agütsür aliba agientsü, civilian tem anientsü atema humanitarian corridors amenoktsütsü aser jangotzü kecha tetsükdaksü makai lemshitsü atema ayongzükogo. Russia Tir Vladimir Putin-i iba rara nung Moscow indang atomic arsenal amshitsü amokmerenba sülen parnoki nuclear hadir amshitsü amokmerenba aser amshitsü tasa asaba anemba jangja-jangja metetdaksüogo. Ukraine Tir Volodymyr Zelenskyy-ia, China-i iba jenjang agiba pelashishia agizükogo aser rara anendaktsütsü atema Kyiv-i Beijing den teka amteper inyaksü nungdaker, ta ashi. "China-i Ukraine indang jembie tenzükgogo aser aji tamajungbo masü," ta Zelenskyy-i ashi. "Onok litsü

asur security ken o akümtsübobba sayur ta bilemer," ta paisa ashi. "Iba onük dak sendakba nung China den külemi inyaksü nungdaker. Asenok mapaji ka sentoktsü atema ajak longjemtsü nungdaker," ta pai shisem. Ukraine lenir-isa China Tir Xi Jinping den ajuruteptsü imlaba lemsatetpa den pa den ajurutepbaji alima security atema kanga tongtibang asütsü ta shia liasü. Ajisüaka Ukraine den sendaktepa alir linük karibo temolung malemba lemsatetpogo, kechiyong Beijing aser Moscow na tesendaktep kanga junga lir. NATO Secretary General Jens Stoltenberg-i ashiba agi, rara tembangdaksütsü atema jembishinütsü asoshi China jenjang shidak nungnokdaka mali. "China tamendak dak majung, kechiyong paroki

Ukraine amakba ya ozüng alema ta maitsüteter," ta pai osangbenertem dang ashi. Paisa, Ukraine mamak tsungda Beijing-i Putin den tenangzüktepa ka yangluogo aser talenba kecha makai yariteptsü nangzükogo, ta ashi. United States-ia, China-i Russia nem teyari agütsütsü atema asadangdar ta ashi, koba Beijing-i magizüki liasü. China nung ken o asadangertemi ashiba agi, Russia-i Ukraine amakba aitsütsü asoshi memolungba ajanga Beijing ya dang tetemsü kümdaksür shirnoki mangatetep bentettsü atema teyari agütsütettsü. Tir Xi Jinping-i jaokba sülen Belarus Tir Alexander Lukashenko-i February 28 nungi March 2 tashi linük semdangtsü ta Chinese foreign ministry-i ashiba sülen tang Macron-i Beijing semdangtsü sentong aliba sangdongogo.



OFFICE OF THE CHIEF ELECTORAL OFFICER NAGALAND :: KOHIMA

ANNOUNCEMENT

We have received more than 300 entries.
All the entries received for the Essay writing and
Video making challenges are being uploaded in the
CEO website- ceo.nagaland.gov.in

The Winners for the challenges will be announced
soon.

@ceonagaland



Menoknok anakba...

(Tapak 7nungi...)

Okkes Kavak ya Gaziantep province nung Nurdagi district tekolakba lir aser Erdogan indang Justice and Development Party (AKP) züngsem lir aser pai ki-o-jen yangluba junga mita mao ta ashir.

Turkey indang disaster management agency, AFAD ajanga ashiba agi, menoknok agi kongshir aliba region nung aftershock (menoknok anakzüker ano ali anakshitsüba) 9,470 liasü.

"Iba ya mapang talangka alitsü... küm ana shi aftershock ya alitsü imlar," ta AFAD General Manager Orhan Tatar-i Ankara nung osangbener dang ashi.

February 6 nü menoknok anakba tesem tiyongtsü nungi anüolen tsütsü kilometre 245 shi pilar Bor jila nung menoknok magnitude 5.3 anakba ya balaka lir, ta pai ashi.

FIFA Men's Player award atema Messi, Mbappe & Benzema shimogo

Paris, Tsüklai/February 26 (Agencies): World Cup final nung ama Paris Saint-Germain teammates Lionel Messi aser Kylian Mbappe na 2022 atema Best FIFA Men's Player award asoshi tokteptsü aser dena den Ballon d'Or ngur alisang Karim Benzema-a densema lir.

Tetushi agütsüba sentong ya Hombarnü Paris nung agitsü aser Qatar world cup nung Mbappe'er France team koka Argentina team takok dangi aniba sülen taküma iba naroküm ya Messi-i agizüktüsü imlar.

Messi-i Ballon d'Or tenetben koka lir aser FIFA award ya 2016 aser 2019 küm ngua lir. Taoba küm ana Messi-i iba naroküm magizük, kechiyong Robert Lewandowski-i ngua liasü saka 2022 küm World Cup akokba ajanga taküm iba naroküm angutsü atema pa jenjang junga kümogo.

Takoker ya tebur national team ajak nungi coach aser captain tem aser linük ajak nungi osangbener kakati telemtetba agir, ajisüaka fan temia vote sütetter.

Kasa mapang nung Mbappe ya Geoff Hurst-i 1966 küm

World Cup final nung hat-trick agütsüba sülen Mbappe ya mezüngbuba asayar aküm.

Mbappe shiba final asayaba sülen arishi küm 24 junga liasü pai World cup nung goal ti idakja iba asayamung nung goal timtiba idaktsüba asayar aküm.

Pa ya World Cup masaya tsüngda PSG atema ajak dang nungi tongtibangtiba asayar liasü. Pa Ligue 1 nung goal timtiba idaktsüba asayar aser France indang player of the year liasü.

"Messi-i World Cup koker asünung iba naroküm angutsü pa jenjang tajungba lir," ta Ruud Gullit-i ashi.

"Ajisüaka ni Mbappe kanga akümtsübur. Kü atemabo paa kasa jenjang nung lir. Final nung khuret bena pai mamangtsüka asayaogo," ta paisa ashi.

Maneni yirur World Cup nung masayatetba ajanga ano jurila sempet ka agizüktüsü asoshi Benzema jenjang mejungi kümdaktsü.

Real Madrid striker yagi taoba season nung asaya 46 nungi goal 44 idaktsü aser par team-i La Liga aser Champions League akokba nung teyari agüja

liasü.

Tetsürtem rongnungi Ballon d'Or tesüsa koker alila Alexia Putellas shibai taoba küm Best award nguogo, la taküma iba naroküm atema shimogo. La temekok yiruba ajanga July ita nungi masayai aruaka iba naroküm atema shimogo.

England forward Beth Mead aser US tsür Alex Morgan nata shimogo.

Coach tema rongnung Argentina coach Lionel Scaloni, Real Madrid coach Carlo Ancelotti aser Manchester City coach Pep Guardiola nung densema lir.

Sarina Wiegman shibai England team nungi Euro 2022 kokogo, la tetsür coach atema Lyon coach Sonia Bompastor aser Brazil coach Pia Sundhage na den shima lir.

Puskas Award for best goal atema World Cup nung Serbia den asayaba mapang Brazil nung asayar Richarlison-i idaktsüba goal densema lir. Marseille nungi asayar Dimitri Payet aser Polish amputee asayar Marcin Oleksy nata iba naroküm atema shimogo.



Cinnaswamy Stadium, Bengaluru nung Royal Challengers Bangalore tetsür aser tebur team den sensaksemba mapang German Chancellor Olaf Scholz nem RC tebur team-i sign asüba bat ka agütsüba noksa nung angur.

New Delhi Marathon: Man Singh, Belliappa & Karthik nung Asian Games atema qualify süogo

Tsüklai/February 26, 2023 (Agencies): Deobarnü New Delhi National Marathon nung takok anguba sülen India nung asemteper Man Singh, Belliappa A.B. aser Karthik Kumar nung September ita asayatsü aliba 2023 Asian Games atema qualify süogo.

Parnok asempronglai qualifying mark ghonda 2 ser minute 15 atakzükja aliba tsüngda alizüing tongteta iba asayamung atema qualify süogo.

Man Singh shibai taoba ita pa indang career nung tajungtiba asemteta alizüing 2:16:58 nung tongteta liasü, pai Deobarnü asemteper mapang alizüing 2:14.13 nung tongteta senpet sen 1,50,000 agizüka liasü.

Belliappa (2:14.15) shibai final leg nung Singh den kanga toktepa asemogo, pai second ana agi dang Singh memenep aser taoba mapang dang nungi minute 2 agi takaraba asemtetogo. Iba asaya nung pai silver medal ngua liasü.

Karthik Kumar-i (2:14.19) second pezü agi tena dang nungi temenoba alizüing tongtet aser pai bronze medal angu.

Elite women tetoktepeba nung Jyoti Gawate-i gold medal angu ajisüaka la Hangzhou, China nung asayatsü aliba asayamung atema qualify mesütet.

Lai alizüing 2:53:04 nung tongtet ajisüaka tetsürtem qualify asütsü atema mapangji

2:47 lir. La sülen Ashvini Jadhav (2:53:06) aser Jigmet Dolma (2:56:41) na tanabuba aser tasembuba jenjang nung tembang.

Deobarnü iba asemteperba nung asemteper 16,000 dak tema category pezü nung asemtepergo, koba linük nung tang tashi nung asayamung ka nung asemteper timba asemteperba asütsü. Elite asayatem anepdang 5 ako nung asemteper tenzüka liasü. Iba asemteperba ya David Rudisha-i tenzüka liasü.

Takokertem:

Marathon (Elite):

Tebur: 1. Man Singh (2:14.13); 2. Belliappa AB (2:14.15); 3. Karthik Kumar (2:14.19)

Tetsür: 1. Jyoti Gawate (2:53:04); 2. Ashvini Jadhav (2:53:06); 3. Jigmet Dolma (2:56:41).

Half Marathon:

Tebur: 1. Kiran Matre (1:05.57); 2. Nano Guta (1:06.03); 3. Tirtha Pun (1:06.21)

Tetsür: 1. Neetu Kumari (1:17.14); 2. Bisle Bikaye (1:18.26); 3. Ujala Ujala (1:21.31)

10K:

Tebur: 1. Rishipal Singh (0:32.56); 2. Abdisa Wolde (0:32.57); 3. Sunny Kumar (0:34.14)

Tetsür: 1. Ekta Rawat (0:38.12); 2. Rozi (0:38.13); 3. Priti Priti (0:39.22).

BILEMDANGANG

"Takok angubaji masü, saka nü tajungtiba agi shilem agibajisa tajungtiba."